

Carsten Niebuhrs Gade 43
1577 København V
Telefon +45 7221 8800
info@trafikstyrelsen.dk
www.trafikstyrelsen.dk

Dato: 10-03-2024
Sagsnr.: 2023-165599
Dokumentnr.: 2905495
Sagsbehandler: KAEIS

Tusarniaaffigineqartunut

**Qulimiguullit mittarfiinut aamma mittarfiit nammineq pigisat
nalunaarutigineqartarnerinut tunngatillugu BL-it nutarsakkat pingasut aamma BL
nutaag ataaseq pillugit missingiutip tusarniutigineqarnera**

Trafikstyrelsenip nutartikkanut missingiutit suliarai:

- BL 3-7, *Mittarfinnik nammineq pigisanik nalunaarutiginninneq, nalunaarsuineq aamma nalunaarsuineramik taamaatitsineq pillugit aalajangersakkat, saqqummersitaq 3., aamma*
- BL 3-8, *Qulimiguulinnut mittarfinnik pilersitsineq, ingerlatsineq aamma taakkununga teknikkikkut piumasaqaatit pillugit aalajangersakkat, saqqummersitaq 4.*
- BL 3-31, *Qulimiguulinnut mittarfinnik nammineq toqqaaneq pillugu aalajangersakkat, saqqummersitaq 2.*

Aamma Trafikstyrelseni BL-imut nutaamut missingiummik suliaqarpoq:

- BL 3-14, *Utaqqiisaagallartumik qulimiguulinnut mittarfinnik pilersitsineq aamma ingerlatsineq pillugit aalajangersakkat, saqqummersitaq 1.*

Missingiutit matumuuna tusarniutigineqarput.

Tusarniaanermut killigitinneqarpoq ulloq 7. april 2024 nal. 12:00

Trafikstyrelsenip noqqaassutigaa, oqaaseqaataasinnaasut emailimut pingaarnermut info@trafikstyrelsen.dk-mut nassiunneqarnissaat, kaeis@trafikstyrelsen.dk-erlugu, suliaq normua 2023-165599.

Missingiummut apeqquteqaataasinnaasut mailadressimut kaeis@trafikstyrelsen.dk-mut saaffiginnissutigineqarsinnaapput.



Siunertaq

Trafikstyrelsenip malilersimavaa, mittarfinnik nammineq pigisanik nalunaarutiginninneq aamma nalunaarsuineq pillugit BL 3-7 aamma qulimiguulinnut mittarfiit nammineq toqqakkat pillugit BL 3-31 nutarterneqartariaqartut. BL 3-7-mik aamma BL 3-31-mik nutarterinerit BL 3-8-imi annikitsumik allannguuteqartitsinissamik aamma kinguneqarput, qulimiguulinnut mittarfinnik pilersitsinermut, ingerlatsinermut aamma teknikkikkut piumasaqaatinut tunngatillugu. Tamatuma saniatigut malittarisassanik nutaanik suliaqarnissaq pisariaqalersimavoq, utaqqiisaagallartumik qulimiguulinnut mittarfinnik pilersitsinermut aamma ingerlatsinermut tunngatillugu, BL 3-14-mut missingiummi allaqqasutut.

BL 3-7-imi aamma BL 3-31-mi atuuffinnut malittarisassat erseqqissut

Trafikstyrelsenip nutarterinermut ingerlanneqartumut atatillugu kissaatigaa, BL 3-7-mi aamma BL 3-31-mi malittarisassat qaqugukkut atuuttarnissaat pillugu erseqqissaanissaq. Tamatumunnga tunuliaqutaavoq, malittarisassat, annermik BL 3-31-mi, pisut ilaanni siunertarisanut naapertuutinngitsumik atorneqartarsimaneri. Tamatuma saniatigut malittarisassani piusuni taaguutit arlallit erseqqarlupput, tamannalu qaqugukkut mittarfiup nammineq pigisatut nalunaarsorneqarnissaa pillugu aammalu teknikkikkut akuerineqaaqartariaqarsinnaanera pillugu patsuunganernik pilersitsisarpoq.

Assersuutigalugu BL 3-7-mi allaqqavoq, sumiiffiit, *ilaannikkuinnaq* aallarnermut aamma minnermut atorneqartartut, nalunaarutigineqartariaqannginnerat, sumiiffiup tunngaviusumik pissusaa allanngortinneqanngippat. Taamaattoq malittarisassani erseqqissarneqanngilaq, *ilaannikkuinnaq* qanoq isumaqartinneqarnersoq, tamannalu qaqugukkut mittarfiup nalunaarsorneqarnissaanut tunngatillugu isumannarsinnaasumik allanngorarsinnaasumillu suleriaaseqarnernik kinguneqarsinnaasarluni.

Erseqqissaanermik amigaateqarnermut assersuut alla BL 3-31-mi nassaarineqarsinnaavoq, tassaassoq qulimiguulinnut mittarfiup toqqakkap luftfartsoperatørimit ataatsimit ullut 30-t iluini annerpaamik ulluni sisamani charter-inut, taxanut aamma qulaavaalluni timminermut atorneqarsinnaanera. Taamaattoq timminerit katillugit amerlassusissaannik killiliisoqanngilaq, tamannalu qulimiguulinnut mittarfiit ilaat annertuumik atorneqarnerinik kinguneqarsimavoq, ingammik aasaanerani qulaavaalluni timminernut.

Malittarisassani erseqqarluttoqarnera isumannartumik inatsisikkut inissisimanermik aammalu naapertuutinngitsunik suleriuseqarnernik pilersitsisimavoq, tassani akiliisunik ilaasoqarluni timminerit amerlasuut mittarfinnit akuerisaanngitsunit ingerlanneqartarlutik. Ilaasut naatsorsuutigisarpaat, isumannaassuseq ajoquteqanngitsoq aammalu oqartussaqaarfinnit nakkutigineqartuusoq, kisiannili tamanna malittarisassatigut atuuttutigut isumannaarneqarsimanngilaq.

Missingiummi nutartikkami BL 3-7-ip aamma BL 3-31-p atuuffii erseqqissarneqarput paatsooqatigiissinnaanerit pinngitsoortinniarlugit aammalu timminerit qaffasinnerusumik isumannaatsuunissaat isumannaarumallugu. Immikkut qitiutinneqarpoq malittarisassat suleriaatsimut atuuttumut aammalu aarlerinaatinut sumiiffinni annertuumik ingerlatsiffiusunut naapertuuttuunissaat. Siunertaavoq ilaasunut isumannaatsuutitsinerup illersorneqarnissaa aamma illuatungeriinnut tamanut erseqqissuliornissaq.

BL 3-8-p nutarterneqarnera aamma BL 3-14-ip ilanngunneqarnera

Inuussutissarsiornermut atatillugu timmisartornermi aamma qulaavaalluni timmisartornermi silaannakkut angallannerup isumannaatsuunissaa nukittorsarniarlugu, aammalu



qulimiguulinnik ingerlatsineq piusoq akuersaarumallugu, Trafikstyrelseni malittarisassanik nutaanik BL 3-14-mik suliaqarpoq. Malittarisassat isumannaarpaat, utaqqiisaagallartumik qulimiguulinnut mittarfiit BL 3-7 malillugu qulimiguulinnut mittarfittut nammineq pigisatut nalunaarsorneqarnissaannik piumasaqaateqarfiunngitsumik atorneqarsinnaanerit imaluunniit BL 3-8 malillugu teknikkikkut akuersineq.

Aammattaaq BL 3-8 nutarsarneqarpoq, qulimiguulinnut mittarfiit pillugit malittarisassat aamma mittarfinnik nammineq pigisanik nalunaarsuisarnerup akornanni ataqatigiinneq aamma assigiissaarineq pilersikkumallugit.

BL 3-7-imi allannguutit

Ullut 30-t iluini ingerlatsinerit annerpaamik arfineq pingasut

Massakkut mittarfiit nammineq pigisat nalunaarutigineqarnissaat aamma nalunaarsorneqarnissaat pillugu BL 3-7-ip aalajangersarpaa, sumiiffiit, ilaannikkuinnaq timminermut atorneqartut, aamma pissutsimikkut allannguiffigineqanngitsut, mittarfittut nammineq pigisatut nalunaarsorneqannginnissaat. Taaguut *ilaannikkuinnaq* erseqqinngimmat aammalu nalunaarsuinissamut pisussaaffik pillugu nalornisitsisinnaammat, BL 3-7-imi nutarsakkami tamanna erseqqissarneqarpoq. Siunissami sumiiffik mittarfittut nammineq pigisatut nalunaarsorneqartalissaaq, ullut 30-t iluini ingerlatsinerit arfineq pingasut sinnerlugit ingerlanneqarsimappata (aallarnerit aamma minnerit).

Mittarfiit nammineq pigisat akuerisaanissaannut piumasaqaat

BL 3-7-imi mittarfiup nammineq pigisap akuerisaanissaannut piumasaqaat ilanngunneqarpoq, tassunga ilagitillugu teknikkikkut, qulaavaalluni timminermut imaluunniit mittarfiup nammineq pigisamik atuineri instrumentflyveprocedur-it atorneqarpat.

Ilaasut akiliisut isumannaassusaat eqqarsaatigalugu pisariaqartutut nalilerneqarpoq, mittarfiup nammineq pigisap teknikkikkut piumasaqaatinik naammassinninnissaa, qulaavaalluni timminermut atorneqarpat, tamanna qaffasinnersumik aarlerinartunik malitseqarmat, ingammik timmineq sumiiffimmi ataatsimi uteqqiasumik ingerlanneqarpat.

Tamatuma saniatigut mittarfimmik nammineq pigisamik akuersinissamik piumasaqaateqarsinnaanermut BL-mi tunngavimmik erseqqissumik pilersitsinissaaq pisariaqartinneqarsimavoq, instrumentflyveproceduri atorneqartillugu. Suleriuseq nalinginnaasoq malillugu mittarfimmut nammineq pigisamut instrumentflyveprocedurini akuersinissamut ilaatigut piumasaqaataavoq, mittarfiup ilusilersuineriut piumasaqaatinik ICAO Annex 14, Volume II-miittunik naammassinninnissaa, timmisartornerup isumannaatsuunissaa qulakkeerniarlugu. ICAO Annex 14, Volume II qulimiguulinnut mittarfinnik pilersitsineq, ingerlatsineq aamma taakkununga teknikkikkut piumasaqaatit pillugit BL 3-8-mi atulersinneqarsimavoq, kisianni malittarisassani atuuttuni ataqatigiinneq iluamik erseqqissarneqarsimanani.

Malittarisassat atuuttut akornanni ataqatigiinneq isumannaarniarlugu maanna BL 3-7 ilassutitut aalajangersakkanut marluusunut innersuussivoq: Mittarfinnik IMC-nik tamanut ammasunik pilersitsineq pillugu BL 3-2, taamaallutik mittarfiit IMC-t nammineq pigisat teknikkikkut akuersissutigineqarsinnaalerlutik, aamma timmisartunut immamut mittartunut sumiiffiit imeqarfiusut pillugit BL 3-36, assigiissaarisumik aaqqiinerit isumannaarneqarnissaannut BL 3-7-imut innersuussisoq.

BL 3-7-imi allannguutit allat:



- **Mittarfiit nammineq pigisat nalunaarsorsimasut** ICAO Aeronautical Chart – 1:500.000 Denmark aamm Visual Flight Guide-mi (VFG) ilanngunneqartalissapput. Taaguutit marluk maanna malittarisassani nassuiaatigineqarput.
- **Nalunaarsuineramik piginnittup** nalunaarsuineranut uppersarsaat takutissinnaassavaa, aamma taaguut nalunaarsuineramik piginnittoq maanna erseqqissarneqarpoq.
- Mittarfimmi nammineq pigisami allannguutit nalunaarutigineqarsimasut nutaanik atugassaqaqtitsiffiulersimanersut imaluunniit pisut ilaanni nalunaarsuinerup uterteqquneqarneranik kinguneqarsinnaanerit pillugu **Trafikstyrelseni nalilersuinissamut periarfissaqalerpoq.**
- **Trafikstyrelsenip aamma aalajangersinnaavaa**, mittarfik nammineq pigisat mittarfittut tamanut ammasutut akuersissuteqartariaqarneris.
- Mittarfiup nammineq pigisat **nalunaarsorneqarneranik taamaatitsinermut piffissarititaasoq** maanna qaammatinut 12-inut aalajangersarneqarpoq.
- **Taaguutit qitiusut arlallit** nassuiarneqarput, tassunga ilagitillugit inuussutissarsiornermi silaannakkut angallanneq, inuussutissarsiornermi silaannakkut assartuineq, ingerlatsineq, mittarfik nammineq pigisat aamma tamanut ammasoq, qulaavaalluni timmisartorneq kiisalu anlægi tekniskiusoq.
- **Allanneqarnera arlalitsigut erseqqissaanernik ilaartorneqarpoq** paasinarnersinniarlugu.
- **Aamma aaqqissuinikkut allannguuteqartitsisoqarpoq**, nassuiaatit ilaat peerneqarlutik imaluunniit aalajangersakkanut ilanngunneqarlutik, tamannali ilitersuinikkut pissutsinik allanngortitsiffiunngitsumik.

BL 3-8-mi allannguutit

Malittarisassat akornanni ataqatigiinneq isumannaarniarlugu qulimiguulinnut mittarfinnik pilersitsineq, ingerlatsineq aamma taakkununga teknikkikkut piumasaqaatit pillugit BL 3-8-mi taaguusersuineq naleqqussarneqarpoq. BL 3-8, saqqummersitaq 3.-mi, sumiiffinni arlalinni taaguut *inuussutissarsiornermi silaannakkut angallanneq* atorneqarpoq, kisianni BL 3-7-imisut aamma BL 3-31-misut assigiimmik isumaqaqtitsiumalluni *inuussutissarsiornermi silaannakkut assartuineq* taaguut eqqortuussaaq atussallugu. Taamaattumik BL 3-8-mi taaguusersuineq maanna naleqqussarneqarpoq, taamaalillutik malittarisassat assigiissaarneqarlutik aammalu aalajangersimasunngortinneqarlutik.

Tamatuma saniatigut ataasiakkaatigut allannera paasinarnersinniarlugu erseqqissarneqarpoq, aamma malittarisassani imarisaasut allanngortinngikkaluarlugit aaqqissuinikkut allannguisoqarpoq.

Kalaallit Nunaanni aamma Savalimmiuni qulimiguulinnut mittarfiit ilaannik ilaatitsinnginneq

Kalaallit Nunaanni aamma Savalimmiuni qulimiguulinnut mittarfiit nammineq pigisat ilaannut teknikkikkut akuersissuteqarnissamut piumasaqaammut ilaatitsinnginnermik ilanngussisoqarpoq. Assersuutigalugu tamatuma Kalaallit Nunaanni sumiiffinni tikikkuminaatsuni ilisimatusarnissaq siunertarlugu ujarassiuunik assartuisinnaaneq periarfissaatippaa, sumiiffimmut atorneqartumut teknikkikkut akuersissuteqarnissaq pisariaqarunnaartillugu. Ilaatitsinnginnermut aamma ilaatinneqarpoq anlæginik tekniskiusunik atortulersuuteqarnermut pingaaruteqartunik aserfallatsaaliinissamut sulisunik assartuineq.

Ilaatitsinnginnermut tunuliaqutaavoq, timmisartornerit taamaattut inuiaqatigiit aaqqissuusaanerannut pingaaruteqarnerat, aammalu sumiiffinni pineqartuni mittarfinnik teknikkikkut akuersissuteqarfiusunik pilersitsinissap ajornarlunnartuusinnaanera. Ilaasut ingerlatsinermut pissutsinut tunngasunik ilisimasaqarput, aamma tassunga ilagitillugit



isumannaassutsikkut aarlerinaatit. Timmisartornerit qaqutigoomata, aningaasarsiutigalugu silaannakkut assartuinnermi aarlerinaatit atuuttartut assingusut siumugassaaneq ajorput.

Qulimiguulinnut mittarfiit taamaattut teknikkikkut akuersissuteqarnissami ilaatinneqanngikkaluartut, BL 3-7-imi malittarisassat malillugit nangittumik nalunaarutigineqartassapput aammalu nalunaarsorneqartassallutik. Taamaattoq qulimiguulinnut mittarfiit pineqartut BL 3-14 malillugu pilersinneqarsinnaanngillat, aaqqissuussineq taanna aalajangersimaqqissaartunik teknikkikkut piumasaqaateqarfiummat, pisumi taaneqartumi naammassineqarsinnaanngitsunik.

BL 3-31-mi allannguutit

Atuuffimmik erseqqissaaneq

Qulimiguulinnut mittarfiit nammineq toqqakkat pillugit BL 3-31 erseqqinnerusumik atuuffimmik killiliinikkut aamma ingerlatsinerit pillugit nalunaarutiginninnissamut piumasaqaammik ilaneqarluni nutarterneqarpoq.

Immikkoortoq 2-mi erseqqissarneqarpoq, malittarisassat danskit oqartussaaffigisaanni qulimiguulinnik ingerlatsinerit atuunnerat, taamaattoq ilaatinngit mittarfiit tamanut ammasut aamma nammineq pigisat, taakku BL 3-5-imi aamma BL 3-7-imi aaqqissuussiffineqarmata.

Killiliineq: Ullut 30-t iluini ingerlatsinerit annerpaamik arfineq pingasut aamma 2 km-zone

Massakkut BL 3-31-p ullut 30-t iluini qulimiguulinnut mittarfinnik nammineq toqqakkamik ullut sisamat angullugit atuineq ajornartinngilaa, kisianni ingerlatsinerit amerlassusissaat erseqqissumik killilernerqaratik. Annertunerusumik ingerlatsineq aarlerinaatit annertunerulernerinik kinguneqarsinnaammat, saqqummersitami nutartikkami ullut 30-t iluini ingerlatsinerit annerpaamik arfineq pingasunut killilerlugit ilanngussisoqarpoq.

Inissiineq annikitsuinnarmik allanngortillugu killiliinermik saneqqussisinnaaneq pinngitsoortinniarlugu, 2 km-zone-mik aalajangersaasoqarpoq, taassuma iluani ingerlatsinerit aamma mittarfinnik nammineq toqqakkami ullut 30-t iluini ingerlatsinertut isigineqassallutik.

Nalunaaruteqarnissamut piumasaqaat nutaaq

Qulimiguulinnut mittarfinnik nammineq toqqakkanik atuinerit malinnaaffigineqarnissaat isumannaarumallugu, ingerlatsinerit pillugit nalunaarutiginninnissamut piumasaqaammik ilanngussisoqarpoq, timmisartoreersimanermiit ullut sisamat qaangiutsinnagit. Tamanna Trafikstyrelsenimut periarfissaqartitsissaaq sumiiffimmi tassani timmisartornerit amerlassusaat pillugit malinnaasinnaannissamut. Taamaalluni nalunaarutiginninnissamut piumasaqaat erseqqissaaqataavoq, qaqugukku sumiiffik, akulikitsumik timmisartuussisarnerit tunuliaqutaralugit, BL 3-7 malillugu mittarfittut nammineq pigisatut nalunaarsorneqartariaqartoq, taamaaliornikkullu malittarisassat marluusut akornanni killiliineq erseqqinnerusooq isumannaarneqarluni.

BL 3-31-mi allannguutit allat

- **Ajornartoornerni ilaatitsinnginneq**, tassani nalunaarutiginninnissamik piumasaqaat kiisalu piginnittuunermut uppersaateqarnissaaq pillugu piumasaqaat atuutsinneqaratik.



- **Isumannaatsuunissamik piumasaqaat**, tassani massakkut erseqqissarneqarluni, ingerlatsinerit tamarmik allat inuunerinut imaluunniit pigisaannut akornutaanngitsumik imaluunniit ulorianartorsiortitsinngitsumik naammassineqarnissaat.
- **Orsersorneq pillugu aalajangersakkat nutaat** ilanngunneqarput.
- **Ilaliussami siusinnerusumi BL 3-31 A-mi allannguutit**, tassani orsersortarfinni qatserummik inissiineq pillugu aamma oqarasuaat qaninnerpaaq pillugu allagartaliineq pillugit piumasaqaatit peerneqarlutik.
- **Nunani allani** danskinit ingerlatsinissamut akuersissuteqarluni **ingerlatsinerit pillugit malittarisassat** atorunnaarlutik.
- **Timmineri atsinnerpaaffissaannik ilaatitsinnginneq** peerneqarluni.
- Taaguutitut soorlu inuussutissarsiornermi silaannakkut assartuineq, ingerlatsineq, mittarfik nammineq pigisaq aamma tamanut ammasoq, qulaavaalluni timmisartorneq, ATS, ICAO Aeronautical Chart, luftfartsoperatøri, qulimiguulinnut mittarfik nammineq toqqagaq aamma illuutitut qanittumiittoq, **nassuiaatit nutaat ilanngunneqarput**.
- **Allanneranik erseqqissaaneq**, tassani sumiiffiit ataasiakkaat erseqqissarneqarlutik imaluunniit erseqqissarlutik naleqqussarneqarlutik.
- **Ilitsersuutitut erseqqissaanerit** peerneqarlutik.

Utaqqiisaagallartumik qulimiguulinnut mittarfiit pillugit BL nutaaq - BL 3-14

Trafikstyrelseni malittarisassanik nutaanik ilanngussaqqarpooq, BL 3-14, mittarfinnut kategoritigut nutaajusukku aqqiisumik: *utaqqiisaagallartumik qulimiguulinnut mittarfiit*. Tunuliaqutaavoq, qulimiguulinnut mittarfiit nammineq toqqakkat pillugit BL 3-31-mi malittarisassat siunertarineqartut malinnagit atorneqarsimaneri, aammalu massakkut piumasaqaatit inuussutissarsiornermi silaannakkut assartuineri aamma qulaavaalluni timmisartuussineri ilaasut silaannakkut angallanneri isumannaassusaat naammattumik isumannaarneqannginneri.

BL 3-14-ip utaqqiisaagallartumik qulimiguulinnut mittarfinnik pilersitsinermut aamma ingerlatsinermut malittarisassat aalajangersaavigai, luftfartsoperatørinut utaqqiisaagallartumik qulimiguulinnut mittarfinnik ingerlatsinissamut Trafikstyrelsenimit akuersissuteqartunit atorneqarsinnaasut. Taakku utaqqiisaagallartumik qulimiguulinnut mittarfiit teknikkikkut akuersissuteqarnissaq pillugu piumasaqaammi ilaatinneqassanngillat, kisiannili nalunaarutiginninnerup kingorna pilersinneqarsinnaallutik aammalu atorneqarsinnaallutik.

Taakku utaqqiisaagallartumik qulimiguulinnut mittarfiit luftfartsoperatørinut tamatumunnga Trafikstyrelsenimit BL 3-14 malillugu akuerineqarsimasunit nalunaarutigineqarsinnaapput, pilersinneqarsinnaapput aamma atorneqarsinnaapput. Utaqqiisaagallartumik qulimiguulinnut mittarfinni ilusilersuineri piumasaqaatit sakkukinnerummata, isumannaallisaanermut atatillugu luftfartsoperatørinut atuuttumik *Air Operator Certificate*-Ilit (AOC), tassaapput kisiartaallutik utaqqiisaagallartumik qulimiguulinnut mittarfinnik pilersitsinissamut akuerisaasinnaasut.

Utaqqiisaagallartumik qulimiguulinnut mittarfinnut tunngatillugu malittarisassanik ilanngussineq pivoq, inuussutissarsiornermi silaannakkut assartuineri annertunerusumik eqaassuseqarnissamik pisariaqartitsineq akueriumallugu – ingammik luftfartsoperatørinut, qulaavaalluni timmisartuussineri ingerlatsinut, kiisalu Kalaallit Nunaanni aamma Savalimmiuni, qulimiguulinnut assartuineq tassaalluni assartueriaaseq annerusumik kisimi atorneqarsinnaasooq. Aammattaaq BL 3-8-mut sanilliullugu teknikkikkut ikinnerusunik piumasaqaateqqarpooq, tamatumalu utaqqiisaagallartumik qulimiguulinnut mittarfinnik sukkasuumik aamma eqaatsumik pilersitsinissaq oqinnerulersippaa.

Eqaannerusumik aqqiisoqaraluartorluunniit silaannakkut angallanneq annertuumik isumannaatsoq malittarisassat isumannaarpaat. Taamaattumik BL 3-14-imi teknikkikkut piumasaqaatit ilusilersorneqarput sukkasuumik pilersitsinissamut pisariaqartitsinerup aammalu isumannaallisaanikkut pisariaqartinneqartut akornanni oqimaaqatigiisitsinikkut.



Utaqqiisaagallartumik qulimiguulinnut mittarfinnik pilersitsineq, ingerlatsineq aamma nakkutilliineq

BL 3-14-ip luftfartsoperatørit akuersissutillit teknikkikkut piumasaqaatit malillugit utaqqiisaagallartumik qulimiguulinnut mittarfinnik pilersitsisinnaatippai aammalu ingerlatsisinnaatillugit. Utaqqiisaagallartumik qulimiguulinnut mittarfiit timmisartornermut atatillugu ivertinneqarsinnaassapput aammalu atorunnaarsinneqarsinnaassallutik, aammalu sumiiffik atorneqarunnaarpat pissusitoqaa attatiinnarneqassalluni.

Luftfartsoperatørit allakkatigut utaqqiisaagallartumik qulimiguulinnut mittarfiit nalunaarutigissavaat aammalu flyvepladshåndbogimik suliaqassallutik, suliarinneriaatsinik, atorunnik aamma ingerlatsinermik nassuiaasumik. Trafikstyrelseni allakkatigut aammalu orniguttarnikkut nakkutilliissaaq, aammalu tamatumunnga atatillugu mittarfinnik taamaattunik pilersitsineq styrelsenip najoqqutassiai malillugit ingerlanneqassalluni.

Luftfartsoperatørip akisussaaffigivaa ingerlatsinerit paasissutissartai nalunaarsussallugit aammalu minnerpaamik ukiuni tallimani toqqussallugit.

Aningaasaqarnikkut aamma allaffissornikkut kingunissat (inuussutissarsiorunut aamma innuttaasunut)

BL 3-31-mi malittarisassat nutartikkat qulimiguulinnut mittarfinnik nammineq toqqakkanut nalunaarutiginninnissamik inatsisitigoortumik piumasaqaammik eqqussipput. Tamanna suliffeqarfinnut aamma innuttaasunut attuumassuteqartunut allaffissornikkut suliaassanik malitseqarpoq, kisiannili ullumikkut nalunaarutiginnittarneq ingerlareermat, pingaarnertut allannguut inatsisitigoortuuvoq. Taamaaqataanik nalunaarutiginnittarnerit ikinnerusut naatsorsuutigineqarput, taassumami ullut 30-t iluini ingerlatsinernut arfineq pingasunut killiliinerup nutaap qulimiguullit mittarfii nammineq toqqakkat atorneqartut ikileriartissammagit BL 3-14-ip ilanngunneqarnera tunngavigalugu. Taamaattumik Trafikstyrelsenip nalilerpaa, allaffissornikkut suliaassat annerusumik qaffariaateqassanngitsut.

BL 3-14-imik ilanngussinerup aamma qulimiguulinnut mittarfinnik nammineq toqqakkanut aqqissuussinerup kingunerissavaat, qulaavaalluni timmisartornerpassuit, siornatigut BL 3-31 malillugu nalunaarutigineqartarsimasut, BL 3-14 malillugu nalunaarutigineqartalernissaat. Suliffeqarfiit attuumassuteqartut operatørit akuersissutaannik qinnuteqassapput aammalu utaqqiisaagallartumik qulimiguulinnut mittarfinnik atuinerit nalunaarutigissallugit. Ikaarsaariarnermut piumasaqaataavoq allaffissornikkut suliaqarnissaq, tassunga ilagitillugit flyvepladshåndbogimik aammalu utaqqiisaagallartumik qulimiguulinnut mittarfiit assinginik suliaqarneq. Taamaattoq siunissaq ungasinnerusoq eqqarsaatigalugu nalilerneqarpoq, allaffissornikkut suliaassat ingerlaavartut killeqarnissaat.

BL 3-14 eqqunneqanngippat, mittarfiit, inuussutissarsiornermi ullut 30-t iluini ullut arfineq pingasut sinnerlugit silaannakkut assartuinerimut imaluunniit qulaavaalluni timmisartornermut atorneqartut, mittarfittut nammineq pigisatut nalunaarsorneqassapput aammalu teknikkikkut akuersissutigineqassallutik, assersuutigalugu BL 3-8 malillugu. Teknikkikkut akuersissuteqarnerup kingunerissavaa annertunerujussuarmik allaffissornikkut aamma aningaasaqarnikkut suliaqarneq, sumiiffiit ataasiakkaat tamarmik immikkut akuersissutigineqartussaammata. Tamatumani BL 3-14 malunnaatilimmik oqilisaavoq, tassami suliffeqarfiit sumiiffiit utaqqiisaagallartut atorsinnaagamikkut akuersissuteqarnissaq oqimaatsoq aqqusaanngikkaluarlugu.

Ataatsimut isigalugu BL 3-14-imi malittarisassat nutaat kinguneraat, taamaallaat BL 3-31-mut sanilliussinerimik allaffissornikkut suliaassat annertunerusut, kisiannili BL 3-7-imut aamma BL 3-8-mut ataqatigiissitsilluni naliliinerimik, allaffissornikkut aamma aningaasaqarnikkut suliaassat



annertuumik ikilineri. Malittarisassat ingerlatseriaaseq eqaannerusoq aammalu atugassatigut annikinnerusumik piumasaqarfiusoq neqeroorutigiumallugu suliarineqarput, taamaaqataanillu silaannakkut angallannermi isumannaallisaaneq qulakkeerlugu.

Erhvervsstyrelsens Område for Bedre Regulering-ip (OBR) nalilersimavaa, inuussutissarsiornermi allaffissornikkut kingunissat 4 mio. koruunit ataatisagaat aammalu taamaattumik amerlineqaqqinnatik.

Atuutilersitsineq aamma piffissaq ikaarsaariarfiusoq

Siunnersuutigineqarpoq BL 3-7, saqqummersitaq 3., BL 3-8, saqqummersitaq 4., BL 3-14, saqqummersitaq 1. aamma BL 3-31, saqqummersitaq 2. **ulloq 1. juli 2025** atuutilersinneqassasut.

BL 3-7-imi ikaarsaariarnermi aalajangersakkamik ilanngussisoqarpoq, tamatuma kingorna sumiiffiit aamma mittarfiit pisut ilaanni malittarisassanut nutaanut naapertuutilersinneqassallutik kingusinnerpaamik ulloq 1. juli 2026.

BL 3-31-mi ikaarsaariarnermi aalajangersakkamik ilanngussisoqarpoq, tamatuma kingorna immikkut akuersissutit BL 3-31, saqqummersitaq 1. malillugu atulersinneqarsimasut, ullup 1. juli 2025 kingorna atorunnaassallutik. Taamaattumik immikkut akuersissuteqarnissaq nangittumik kissaatigigaanni nutaamik qinnuteqartoqassaaq.

Tusarniaanermi allagaatit aamma atulersitsineq

Tusarniaanermi allagaatit aamma [Høringsportalen \(www.hoeringsportalen.dk\)](http://www.hoeringsportalen.dk)-mi takuneqarsinnaapput, tassanittaaq tusarniaanermut akissutit aamma Trafikstyrelsenip akissutai tamanut saqqummiunneqarumaarlutik. Tusarniaanermut akissuteqarnermut ilutigitiillugu tusarniaavigineqartup akuerissavaa, tusarniaanermut akissutip, ateq ilanngullugu, aamma najukkatut nalunaarutigineqarsimasinnaasoq aammalu e-mailadressi, Høringsportalenimi tamanut saqqummiunneqarnissaat.

Oqaaseqaatigineqarpoq, Trafikstyrelsenip nalinginnaasumik tusarniaaffigineqartut ilisimatitsissuteqarfigineq ajorai BL-t atulersinneqaraangata.

BL-t atulersinneqartut Trafikstyrelsenip [nittartagaani \(www.trafikstyrelsen.dk\)](http://www.trafikstyrelsen.dk)-mi Inatsisit aamma malittarisassat ataanni nassaarineqarsinnaapput. Nyhedsbrev-erput aamma malittarisassat atulersinneqarsimasut pillugit paasissutissanik imaqarpoq. Nittartakkami aamma nyhedsbrev-imut ilannguttoqarsinnaavoq.

Inussiarnersumik inuulluaqqusillunga

Karen Eichert Sehested

Inatsisileritooq